

**357**

Na osnovu člana 27. stav 1. Zakona o postupku zaključivanja i izvršavanja međunarodnih ugovora ("Službeni glasnik BiH", broj 29/00), člana 14. st. 2. i 30. člana 31. stav 3.b) Ugovora o slobodnoj trgovini između Bosne i Hercegovine i Republike Hrvatske ("Službeni glasnik BiH-Međunarodni ugovori", broj 35/00), člana 17. Zakona o Vijeću ministara Bosne i Hercegovine ("Službeni glasnik BiH", broj 38/02), Vijeće ministara Bosne i Hercegovine na 36. sjednici održanoj 23. decembra 2003. godine, donosi

**ODLUKU**

**O PRIVREMENOM PRODUŽENJU PRIMJENE CARINA  
DEFINISANIH ZA 2003. GODINU U UGOVORU O  
SLOBODNOJ TRGOVINI IZMEĐU BOSNE I  
HERCEGOVINE I REPUBLIKE HRVATSKE, NA ROBE  
HRVATSKOG PORIJEKLA IZ GLAVA 01, 02, 04, 15, 16 I  
20 CARINSKE TARIFE BOSNE I HERCEGOVINE**

**I**

U Bosni i Hercegovini se privremeno do 1. aprila 2004. godine, produžava primjena carina definisanih za 2003. godinu u Ugovoru o slobodnoj trgovini između Bosne i Hercegovine i Republike Hrvatske, na robe hrvatskog porijekla iz glava 01, 02, 04, 15, 16 i 20. Carinske tarife Bosne i Hercegovine.

**II**

Carinske vlasti u Bosni i Hercegovini će na robe hrvatskog porijekla iz glava 01,02,04,15,16 i 20 Carinske tarife Bosne i Hercegovine naplaćivati carine po stopama predviđenim za 2003. godinu, u skladu sa Ugovorom o slobodnoj trgovini između Bosne i Hercegovine i Republike Hrvatske.

**III**

Ova odluka stupa na snagu danom donošenja a objavit će se u "Službenom glasniku BiH", službenim glasilima entiteta i Brčko Distrikta Bosne i Hercegovine.

VM broj 240/03  
23. decembra 2003. godine  
Sarajevo

Predsjedavajući  
Vijeća ministara BiH  
Adnan Terzić, s.r.

**358**

Na osnovu člana 27. stav 1. Zakona o postupku zaključivanja i izvršavanja međunarodnih ugovora ("Službeni glasnik BiH", broj 29/00), čl. 26. i 27. stav 4. Ugovora o slobodnoj trgovini između Bosne i Hercegovine i Državne zajednice Srbije i Crne Gore ("Službeni glasnik BiH-Međunarodni ugovori", broj 9/02), člana 17. Zakona o Vijeću ministara Bosne i Hercegovine ("Službeni glasnik BiH", broj 38/02), Vijeće ministara Bosne i Hercegovine na 36. sjednici održanoj 23. decembra 2003. godine, donosi

**ODLUKU**

**O PRIVREMENOM PRODUŽENJU PRIMJENE CARINA  
DEFINISANIH ZA 2003. GODINU UGOVOROM O  
SLOBODNOJ TRGOVINI IZMEĐU BOSNE I  
HERCEGOVINE I DRŽAVNE ZAJEDNICE SRBIJE I  
CRNE GORE, NA ROBE PORIJEKLOM IZ SRBIJE I  
CRNE GORE GLAVA 01, 02, 04, 15, 16 I 20 CARINSKE  
TARIFE BOSNE I HERCEGOVINE**

**I**

U Bosni i Hercegovini se privremeno do 1. aprila 2004. godine, produžava primjena carina definisanih za 2003. godinu

Ugovorom o slobodnoj trgovini između Bosne i Hercegovine i Državne zajednice Srbije i Crne Gore, na robe porijeklom iz Srbije i Crne Gore iz glava 01, 02, 04, 15, 16 i 20 Carinske tarife Bosne i Hercegovine.

**II**

Carinske vlasti u Bosni i Hercegovini će na robe porijeklom iz Srbije i Crne Gore iz glava 01, 02, 04, 15,16 i 20 Carinske tarife Bosne i Hercegovine naplaćivati carine po stopama predviđenim za 2003. godinu, u skladu sa Ugovorom o slobodnoj trgovini između Bosne i Hercegovine i Državne zajednice Srbije i Crne Gore.

**III**

Ova odluka stupa na snagu danom donošenja a objavit će se u "Službenom glasniku BiH", službenim glasilima entiteta i Brčko Distrikta Bosne i Hercegovine.

VM broj 241/03  
23. decembra 2003. godine  
Sarajevo

Predsjedavajući  
Vijeća ministara BiH  
Adnan Terzić, s.r.

**MINISTARSTVO KOMUNIKACIJA  
I PROMETA BOSNE I HERCEGOVINE**

**359**

Na osnovu člana 47. stav 1. a u vezi sa članom 9. Zakona o međunarodnom i međuentitetskom cestovnom prijevozu ("Službeni glasnik BiH", br.1/02 i 14/03), ministar komunikacija i prometa, donosi

**PRAVILNIK**

**O ANGAŽIRANJU UGOVORNOG PRIJEVOZNIKA ZA  
OBAVLJANJE PRIJEVOZA PUTNIKA NA REDOVNIM  
MEĐUNARODNIM AUTOBUSKIM LINIJAMA**

**I - OPĆE ODREDBE****Član 1.**

Ovim pravilnikom uređuju se kriteriji, postupak i način angažiranja ugovornog prijevoznika pri obavljanju prijevoza putnika na redovnim međunarodnim autobuskim linijama.

**Član 2.**

Izrazi upotrijebljeni u ovom pravilniku imaju slijedeća značenja:

1. **"Domaći prijevoznik"** je pravno ili fizičko lice registrirano za obavljanje međunarodnog prijevoza putnika, čije je sjedište, odnosno prebivalište na teritoriji Bosne i Hercegovine;
2. **"Strani prijevoznik"** je pravno ili fizičko lice registrirano za obavljanje međunarodnog prijevoza putnika, čije je sjedište, odnosno prebivalište u inostranstvu;
3. **"Ugovorni prijevoznik"** je domaći prijevoznik koji je na osnovu pisanog ugovora angažiran za obavljanje prijevoza putnika na redovnim međunarodnim autobuskim linijama;
4. **"Dozvola za redovni međunarodni linijski cestovni prijevoz putnika"** je dozvola koju je nadležno tijelo Bosne i Hercegovine izdalo domaćem prijevozniku, na način utvrđen zakonom i međunarodnim sporazumom a koja vozilu domaćeg prijevoznika omogućava pristup na teritoriju druge države, u skladu sa odobrenim redom vožnje međunarodne autobuske linije, koji je sastavni dio dozvole;

5. "**Saglasnost**" je dokument kojim prijevoznik dokazuje da ima pravo obavljati prijevoz putnika na redovnim međunarodnim autobuskim linijama, kao ugovorni prijevoznik.

Drugi izrazi upotrijebljeni u ovom pravilniku imaju isto značenje kao što ga imaju u Zakonu o međunarodnom i međuentitetskom cestovnom prijevozu (u daljem tekstu: Zakon) i međunarodnim ugovorima, koji obavezuju Bosnu i Hercegovinu.

## II - KRITERIJI ZA ANGAŽIRANJE UGOVORNOG PRIJEVOZNIKA

### Član 3.

Za obavljanje međunarodnog linijskog prijevoza putnika na registriranoj liniji domaći i/ili strani prijevoznik mogu angažirati ugovornog prijevoznika koji će, u njegovo ime, obavljati taj međunarodni prijevoz.

### Član 4.

Domaći i/ili strani prijevoznik mogu na registriranoj liniji angažirati ugovornog prijevoznika, koji ispunjava slijedeće uslove:

- ima licencu za obavljanje međunarodnog prijevoza putnika,
- je registriran za obavljanje međunarodnog prijevoza putnika.

## III - POSTUPAK I NAČIN ANGAŽIRANJA UGOVORNOG PRIJEVOZNIKA

### Član 5.

Za angažiranje ugovornog prijevoznika iz člana 4., domaći i/ili strani prijevoznik mora imati saglasnost Ministarstva komunikacija i prometa (u daljem tekstu: Ministarstvo), koja se izdaje na zahtjev prijevoznika koji namjerava angažirati ugovornog prijevoznika, uz uvažavanje načina i postupka utvrđenih Zakonom i ovim pravilnikom.

Saglasnost iz stava 1. se izdaje na period od godinu dana.

Obrazac saglasnosti dat je u prilogu ovog pravilnika i čini njegov sastavni dio.

### Član 6.

Zahtjev za izdavanje saglasnosti za angažiranje ugovornog prijevoznika za obavljanje prijevoza putnika na redovnoj međunarodnoj autobuskoj liniji sadrži:

- naziv, matični broj, poreski broj i sjedište prijevoznika i ugovornog prijevoznika,
- ime i prezime lica odgovornog za prijevoz kod prijevoznika i ugovornog prijevoznika,
- naziv redovne međunarodne autobuske linije na kojoj se namjerava angažirati ugovorni prijevoznik, s

nazivom i sjedištem stranog prijevoznika, odnosno kooperanta,

- dokazi o izmirenju poreskih obaveza prijevoznika i ugovornog prijevoznika,
- dokaz da nisu izrečene mjere protiv prijevoznika i ugovornog prijevoznika na osnovu Zakona, odnosno međunarodnih ugovora,
- broj i važenje izdate licence prijevoznika i ugovornog prijevoznika,
- vrsta prijevoza za koje je licenca izdata prijevozniku i ugovornom prijevozniku,
- marka, tip i registarski broj, te drugi podaci o vozilima, za koje su izdate licence za vozilo, prijevoznika i ugovornog prijevoznika.

Uz zahtjev se prilaže:

- ugovor o reguliranju međusobnih prava i obaveza između prijevoznika-nosioca registrirane linije i ugovornog prijevoznika i
- pismeni pristanak kooperanta prijevoznika - nosioca dozvola na redovnoj međunarodnoj autobuskoj liniji, za angažiranje ugovornog prijevoznika.

### Član 7.

Ugovorni prijevoz se obavlja na osnovu:

- izdatih dozvola Bosne i Hercegovine, odnosno države u kojoj je sjedište inostranog prijevoznika-kooperanta,
- saglasnosti iz člana 5.,
- putnog naloga i
- ugovora o reguliranju međusobnih prava i obaveza o angažiranju ugovornog prijevoznika, čije je sjedište na istoj teritoriji na kojoj je sjedište jednog od prijevoznika.

### Član 8.

Ugovorni prijevoznik, kome je izdata saglasnost, dužan je postupati u skladu sa uslovima iz dozvole, nacionalnim zakonodavstvom prijevoznika i odredbama međunarodnih ugovora, kojima je regulirana oblast prijevoza putnika.

U slučaju povrede odredaba iz stava 1. data saglasnost će biti povučena.

### Član 9.

## IV - ZAVRŠNE ODREDBE

Ovaj pravilnik stupa na snagu danom objavljivanja u "Službenom glasniku BiH".

Broj 01-345-909-1/03  
18. decembra 2003. godine  
Sarajevo

Ministar  
dr. **Branko Dokić**, s. r.

Na osnovu člana 5. Pravilnika o angažiranju ugovornog prijevoznika za obavljanje prijevoza putnika na redovnim međunarodnim autobuskim linijama ministar komunikacija i prometa, i z d a j e

## S A G L A S N O S T

**za angažiranje ugovornog prijevoznika  
na održavanju redovne međunarodne autobuske linije**

Prijevoznik 1).....iz.....,

Prijevoznik 2).....iz....., i

Prijevoznik 1).....iz.....,

Prijevoznik 2).....iz.....,

mogu angažirati ugovornog prijevoznika.....

iz..... na održavanju redovne međunarodne autobuske linije:

.....

Original dozvole Bosne i Hercegovine, odnosno države u kojoj je sjedište stranog kooperanta, dozvole država kojima tranzitira ova linija, saglasnost, ovjeren putni nalog i Ugovor o reguliranju međusobnih prava i obaveza pri angažiranju ugovornog prijevoznika moraju se nalaziti u autobusu svo vrijeme obavljanja prijevoza na navedenoj liniji.

**Saglasnost vrijedi za vremenski period**

<b>Od</b>	<b>Do</b>
-----------	-----------

**MINISTAR**

Sarajevo, \_\_\_\_\_